

83

U 52

MAHLIYO UMURZOQOVA

# TUYG'ULAR ALANGASI



KITOBIM



BIRINCHI

SHE'RLAR

83

3392

U 52

M. Umurzodova

Tuygular

alangasi

Китоб шу ерда кўрсатилган муддатдан  
кечиктирилмаган ҳолда топширилиши шарт

Илгариги берилмалар миқдори \_\_\_\_\_


18/05.2448.На

O'ZBEKISTON YOZUVCHILAR UYUSHMASI  
"IJOD" JAMOAT FONDI

MAHLIYOXON UMURZOQOVA

# TUYG'ULAR ALANGASI

*She'rlar*



TOSHKENT  
"ADABIYOT"  
2020

Nashr uchun mas'ul:  
**Sirojiddin SAYYID,**  
*O'zbekiston Yozuvchilar uyushmasi raisi*


Mas'ul muharrir:  
**Shodmonqul SALOM**

Ushbu kitobda MahliyoXonning samimiy ko'ngil egasi ekanligiga, vijdoni tozaligiga guvoh bo'lasiz. "Tuyg'ular alangasi" nomi ostida chop etilgan mo'jaz kitob o'quvchisini bepoyon vodiydан olib o'tib, samimiy qishloqlar tomon yetaklaydi. Ko'ngil qa'ridan shalola kabi sizib chiqqan she'rlar o'z o'quvchisini topadi degan umiddamiz.

*Ushbu kitob 2018-yili O'zbekiston Yozuvchilar uyushmasi o'tkazgan Respublika yosh ijodkorlarining Zomin seminarida nashrga tavsiya qilinib, "Ijod" jamoat fondi tomonidan moliyalashtirilgan.*

ISBN 978-9943-6472-7-5

© M. Umurzoqova, 2020  
© "Adabiyot", 2020



## TUYG'ULAR ALANGASI

Birinchi kitobi – shoirning pasporti. Uni o'qigan o'quvchiga shoir haqida boshqa sharh, izoh kerakmas. She'r yangi ko'z ochgan buloqdek gap. O'ziga yo'l izlaydi, to'ladi, so'ng toshadi. Gap shu "buloq"ning manbasi naqadar katta yoki kichikligida. She'rning hayoti ham inson umriga o'xshab ketadi. U ham o'zi topgan, kashf etgan dunyoda o'zining mustaqil turmushini boshlayveradi. Yozayotgan odam savollariga javob izlayotgan bo'ladi doim. U har qanday savolning javobi o'zida bo'lishini ham teran anglaydi. Bu azal haqiqatni his qilmay turib she'r sayyorasiga yaqin kelib bo'lmaydi, she'r his qilinmaydi u holda. She'r bitayotgan kishi o'z quvonch-u og'riqlari, sog'inch-iztiroblari qog'ozga tomayotganini anglar ekan, u baxtiyordir. Shu tuyg'ularning qog'ozga ko'chishi ijodkor iste'dodini ko'rsatadi. Uning suvratini chizadi. Mahliyo Umrzoqova ham shunday ishga bel bog'lab turibdi.

Uning she'rlarida:

*Men quyoshga boychechaklar tutgan edim,  
Barmog'imning uch-uchlari kuyib qolgan.*

Yoki:

*Keyin bildim: Dunyo – terakzor,  
Keyin sezdim: Vaqt yuguradi.*

*Men izlagan bolalik – qizim,  
Qo'llarimdan ushlab turadi, – kabi satrlari*  
kishiga yorug' umid ulashadi. Ko'ngliga sodiq  
bir shoironing tashrifidan xabar keltiradi. U  
so'z qo'llashga ehtiyotkorlik bilan yondoshadi.  
Shu bois she'rlari qisqa, aytar gapi aniq. Albat-  
ta, har bir ijodkorda bo'lganidek, Mahliyoning  
yozganlarida ham goho tajribasizlik, shosh-  
ma-shosharliklar uchraydi. Ammo yoshlikning  
qudrati, samimiyati ko'p narsalarni yopib  
ketishini hisobga olgan holda, ilhom va ilm,  
hayrat va tajriba ijodkorning asl qanoti ekanini  
bilishini istardim. Quvonarlisi, qimtinib turgan  
shasht va jur'at. Va uning "Tuyg'ular alangasi"  
nomli ilk kitobiga jamlangan she'rlaridagi "o'zi  
kelgan", yurakni kesib o'tgan satrlari quvonch-  
li. Shu kechmish unda qaytalayversin.

**Shodmonqul SALOM,**  
*O'zbekiston Yozuvchilar uyushmasi a'zosi,  
shoir.*

## SHE'RIYAT

Ko'ksimdan bo'ylagan dardlarim  
Tilimga ko'chmadi – sir bo'ldi.  
Barmog'im titradi, yuragim  
Shu kecha bir qadah she'r bo'ldi.

Ko'zingni mahv etdi ko'zlarim,  
Nigohlar suhbatini bir bo'ldi.  
Qarog'lar to'lishdi yoshlarga,  
Bu durlar yig'ilib she'r bo'ldi.

Bir isyon tiladi yuragim,  
Shu afg'on senmiding, she'riyat?  
Qoshingda sig'indi yuragim,  
She'riyat – eng go'zal bir niyat.

Men hurlar hasratini tingladim,  
Tingladim qanotli so'zlarni.  
Ko'rdim men Uvaysiy izini  
Va ko'rdim yulduzko'z qizlarni.

Ilhomim boshimda soyabon,  
Jonimga quvvat ber, she'riyat.  
Yelkamdan ozgina suyabon  
Shiddat ber, hikmat ber, she'riyat...

Chokidan so'kilsa gar ko'ngil,  
To so'nggi nafasda der bo'lsam:  
She'riyat – abadiy taskindir,  
She'r yozsam, she'r yonsa, she'r bo'lsam.

**ONAMGA**

Ko'nglingizga boshlaydi har yo'l,  
Barini his etdim, parvonam.  
Siz bog'imsiz yashnagan so'lim,  
Sizga borim berayin, Onam.

Navolarga aylanib bugun,  
Boringizga shukr qilay man.  
Yuragimni yoritar chiroq,  
Ona, sizsiz nima qilaman?

Pastga qarab oqqanidek suv,  
Bolam, deya yonib-kuyaman.  
Ona, bugun bolamga boqib,  
Mehnatingiz qadrin tuyaman.

Oybarchinim, ona lochinim,  
Poyingizda payondoZ jonim.  
Sizga yo'ldosh bo'lay, farishtam,  
Menga dildosh bo'ling, Onajon!

Duolaring – bir juft kabutar,  
Qo'sh yelkamga kelib qo'nadi.  
Ma'yusgina qizingiz birdan  
Hayot sari quvnab jo'nadi.

Ona desam gullar chor-atrof,  
Ona-Vatan, Vatan ham Ona!  
Mehribonim, sizning qadringiz  
Ona bo'lib bilyapman, Ona.



## VATAN

Mana, qo'llarimda bir hovuch tuproq,  
Mana, shu tuproqda ungan gul-rayhon.  
Ana, osmonlarga yelka tutgan tog',  
Mushfiq tandirlarda pishdi issiq non.

Vasfingni kuylaydi turnako'z buloq,  
Ohanglari yetar ummongacha to.  
Buyuk bobolarning ruhlari uyg'oq,  
Yulduzlar jilvasi bergaydir sado.

Vatan, onam kabi mehrga boysan,  
Vatan, otamdayin niyati baland.  
Vatan, singlimdayin sohibchiroysan,  
Vatan, akamdayin oriyatli, mard.

Bag'rimda ulg'ayar jajji niholim,  
O'g'lim, lochinlarday uchgaysan ozod.  
Sendan so'zlar kutib turgan shu aziz  
Vatanni unutma, suygin umrbod.

## YILLAR, YO'LLAR...

Dadam: "Ona qizim" deydilar,  
Qarog'ida to'lib yoshlari.  
Men buvimni eslatamanmi,  
O'xshaydimi ko'zim, qoshlarim?

Bola edim, anglamas edim  
Dadam sog'inch bilan boqishin.  
Uzun ko'ylak, sochpopuklarim,  
Soddaligim bilan yoqishim.

Yillar, yo'llar, sog'inch va hijron  
Ko'zlaringiz quvonchdan nammi?  
Dada, menga rostini ayting,  
Men buvimni eslatamanmi?



## MASOFA

Jim turibman, so'zlamayapman,  
Yuragimni yoqar hayajon.  
Sizni qaydan topdim?!  
O, shu dam...  
Men o'zimni yo'qotdim tamom.

Tegmanozik va mag'rur edim,  
Ko'nglimga hech yetmadi kuchim.  
Cheksizlikka chorlasa samo,  
Yuragimni ko'tarib uchdim.

Yuragimga yaqin edingiz,  
Hayotimni yoritgan chaqmoq.  
So'z aytishga bir baxya qoldi,  
Men sevaman sizni qattiqroq.  
Har kungidan boshqacha, ko'proq...



\* \* \*

Bolalikni terakzorlarda  
Adashtirib kelganman o'zim.  
Endi esa uni axtarib  
O'tayapti bahor, yoz, kuzim.

Keyin bildim: Dunyo – terakzor,  
Keyin sezdim: Vaqt yuguradi.  
Men izlagan bolalik – qizim,  
Qo'llarimdan ushlab turadi.

### KITOBLAR BAHSI

– Men yangiman, muqovam yangi,  
Shitirlaydi qanotim – varoq.  
O'chgan sening muqovang rangi,  
Sahifangga to'kilgan siyoh.

– Mendan kulmang, yo'q, havas qiling,  
O'qilganman sizlardan ko'proq.  
Qancha sevib o'qilgan bo'lsam,  
Yechiladi shuncha ko'p so'roq.

Kitoblarning bahsini tinglab,  
Oshib borar ajab hayratim.  
Eski bo'lsin yo bo'lsin yangi,  
Kitoblarga oshar hurmatim.

## BAXT ISI...

Nur sizadi tog'lar bag'ridan,  
Uyg'onishar sezgir daraxtlar.  
Yumalab tushadi so'ridan  
Bag'ri bo'shab qolgan savatlar.

Saharda tandirga o't qalab,  
Munisginam mehr yopadi.  
Savatlar bag'rini to'ldirar..  
Har tong shunday qadr topadi.

Mudragan hovliga suv sepib,  
Uyg'otar erinchoq tuproqni.  
Mehr-la o'pgandek yuzidan  
Tong uyg'ota boshlar qishloqni.

Quyosh kelar oltin kokilli  
Olov yolli, uchqur qanotda.  
Taraladi shirin bir nafas  
Baxt isi keladi hayotdan.

## BOLALIGIM

Bolaligim bolalikda qolib ketdi,  
Hayot – to‘lqin, yot qirg‘oqqa olib ketdi,  
Marg‘ilonda buvim kabi yo‘lim poylab,  
Majnuntolning yelkalari tolib ketdi.

Dimog‘imda gul-lolaning bo‘yi qolgan,  
Qulog‘imda kapalakning kuyi qolgan.  
Men quyoshga boychechaklar tutgan edim,  
Barmog‘imning uch-uchlari kuyib qolgan.

Anhorlarga hasratimni otgim kelar,  
Onajonim halvolarin totgim kelar.  
Beg‘uborlik bulog‘idan suv simirib,  
Takror o‘sha damlarimga qaytgim kelar.



## MARG'ILONIM

Aziz vatan boshlangaydir ayvonidan,  
Jannat bo'yi kelar gul-u rayhonidan,  
Kunduzlar ham yulduz ketmas osmonidan,  
Adrasingday tovlanasan, Marg'ilonim!

Marg'inoniy chiroqlarin yoqqan elsan,  
Uvaysiyga mehr bergan tili bolsan,  
Bolangga ham sizlab tumor taqqan gulsan,  
O'zingga ham ko'z tegmasin, Marg'ilonim!

Kamalakka yetti rangni bergan chevar,  
Qo'li qadoq, hayotsevar, mehnatsevar,  
Dehqonlari paxta ekib, yulduz terar,  
Qutlug' makon ham sharaf-shon,  
Marg'ilonim!

Kumushingga izdosh bo'lib ketib qoldim,  
"O'tkan kunlar" qanday kundir, endi bildim,  
Oftoboyim, salomingiz eltib bordim,  
Toshkan bilan bir tan-u jon, Marg'ilonim!

Otabekning bekligini sinab berdim,  
Kumushbibi, yostig'ingga yig'lab ko'rdim,  
Marg'ilonni tushda ko'rib sahar turdim,  
Onam kabi muqaddassan, Marg'ilonim!

Ona, desam, borgin, bolam, xo'pmi dersan,  
Mehring xuddi gulpaxtadek lo'ppidirsan,  
O'zbekiston boshidagi do'ppidirsan,  
Mahliyoman senga bugun, Marg'ilonim!

\* \* \*

Qo'shtegirmon erur manov qishloq nomi,  
Chindan ham qo'sh tegirmoni bormikan, yo...  
O'z-o'zidan qo'yilmaydi joylar nomi,  
Qo'shtegirmon borligi-chun qo'ygan birov.

"Tut tagi" deb ataganlar mahallamni,  
Ul tutzorning ipaklari ko'kka yetgan.  
Bolalikning tutzorlari yo'qdir, uni  
Zamonaning oyboltasi kesib ketgan.

Bu diyorlar go'zal, dilda yo'qdir armon,  
Lekin tutni o'ylaganda g'am chekaman.  
Atlas kabi tovlanmoqda, ana, osmon,  
Qishlog'imga bir kun kelib tut ekaman.

### MANZARA

Qumga bag'rin bergan bolakay  
Qizg'aldoqqa yotar ko'z tikib.  
Nimagadir hafsalasi yo'q,  
Qizg'aldoqdek boshini bukib.

Beparvodek tikilar ko'kka,  
Qaldirg'ochga boqar bema'no.  
Bolakayning qalbida, balki,  
Yuksalmoqda o'zga bir dunyo.

Ammo buni hech kim bilmaydi,  
Bola bunga parvo qilmaydi.



## BEGIM

Ha, sevishni bilmaganim rost,  
Deyolmasdim yurakka: "Sevgin!"  
Yashash nima, o'rgangan, xolos,  
O'n sakkizga to'ldi bir kelin.

Qo'lim tutib, yetaklaganim,  
Ko'zim ochib ko'rganim - baxtim,  
Kirib borib ertaklariga,  
Yashayapman xotirjam va jim.

Muhabbatga aylandi bugun,  
Muhabbatni yaratdim takror.  
Gulg'unchamiz ulg'ayib gulgun,  
Dunyolarga boqmoqda ilk bor.

Imlashadi fasllar turfa,  
Men ularga boqmadim lekin.  
Bahorlarni qildingiz tuhfa,  
Qalbingizda gulladim, Begim!

\* \* \*

Bir og'iz so'z...  
Shuncha qiyinmi?  
Imkonsizmi bir bor shivirlash...  
G'ururingiz... ko'nglim o'yinmi?

So'zlaysizmi, termulaman jim  
Fig'onimga biror sas qani?  
Xo'rsinasiz... uning ismi kim?  
Nahot, uning egasi menmi?

Tutqun qushday titraydi yurak,  
Qarshingizda zorman, muhtojman.  
Bir og'iz so'z... judayam kerak,  
Keyin nafas ola boshlayman.  
Balki, boshqa hayot boshlayman.




\* \* \*

Yuzlarimni silaydi bir his,  
Sezmayapman xayollar bilan.  
Yuragimda tug'ilgan tuyg'u  
Titrog'imdan to'qiydi gilam.

Yo'llaringga to'shayin dilni  
Tovonlaring o'pmoqlik uchun.  
Ammo qanday bog'layin tilni,  
Sevishimni aytmaslik uchun.

She'r chaqimchi, chaqib beradi,  
Devorlardan mo'ralagandek.  
Oshkor etar o'zini shunday,  
Xuddi mendan o'pkalagandek.

Mayli, dildan quvay qayg'uni,  
Lekin sira izhorni kutma.  
Bir kun kelib o'sha tuyg'uni  
Kashf etamiz - birga, unutma.



## TONG QO'SHIG'I

Gunohlardan forig' emish oppoq tonglar,  
Kechib qaro kechalarning o'tmishidan.  
Yurak - sezgir, jimlikning ham so'zin anglar,  
Sabolarga so'ylar kecha kechmishidan.

Maysalarning ko'zlaridan yoshin artib,  
Quyosh nuri erkalardi havolarni.  
Uyquchi dil shabbodaning kulgusidan  
Ilg'ab borar bir munavvar navolarni.

Ishq niholin undirardi vujudida,  
Yolg'on dunyo bu gullarni ko'rsa edi.  
Uning kabi ozor topgan xasta dillar  
Oq tonglarning labidan bol so'rsa edi...

Gunohlardan forig' emish oppoq tonglar...



## BULOQ

Ming yil kerak emish bitta buloqning  
O'z sirin olamga aytmog'i uchun.  
Yana shuncha fursat kamlik qilarkan  
Odamlar borligin anglamoq uchun.

Qancha bahor-u kuz, qancha yo'lovchi  
Bu buloq yonidan o'tar, suv ichar:  
Qay biri shukrona aytar Tangriga,  
Qay biri iddao etigin yechar?..

Buloq – tabiatning totli kulgusi,  
Tinglagan yurakda qolmaydi alam.  
Uni anglamagan, bunga kelmagan,  
Qo'shiqni sezmaydi kelganida ham.  
Hayotni sezmaydi kelganida ham.



## XOTIRA

Bardoshni sog'inchlar sindirib ketdi  
Azim to'g'onlarni sel olganiday.  
Tog'lar boshiga ham oq tushdi go'yo  
Ayol xo'rsinadi g'ami tugamay.

Xotira qo'rini xomush titkilab,  
Tig'laydi ko'ksini armonlar takror.  
Umid marjonlari uzildi butkul,  
Sen ham diydorimni qo'msadingmi, yor?

Ushalmas orzudek sening xotirang,  
Charos ko'zlarimga singib ketadi.  
Bilaman, yuragim oh ura-ura,  
Barchasin jimgina yengib o'tadi.



\* \* \*

Senga to'qnash keldim tasodif  
Nelarnidir berib qo'yibman.  
Ko'zlaringga boqmayman dedim,  
Nigohingni dilga o'yibman.

Kulgularing rostga o'xshadi,  
Nigohlarning so'zlari haqmi?  
Men o'zimni taniyolmadim,  
Seni qaydan taniyman, taqdir?

O'tinaman, kelma, tasodif,  
Xatolarga chiday olmayman.  
Sen yoningga chorlasang hamki,  
Endi men yoningga bormayman.

Iltijolar qilsang ham, mayli,  
Yuragimdan o'tib bormayman.  
Magar borsam, bor-yo'g'im olib,  
Yuragimni tutib boraman.

\* \* \*

Kulgum...  
Kulgularim bilan yondirib,  
Nigohingga singib ketaman.  
Senga zarra ehtiyojim yo'q,  
Men endi ketaman, ketaman...

Qayg'um...  
Qayg'ularim beadoq yo'ldir,  
Pushaymondan o'zga choram yo'q.  
Meni ko'kka chorlaydi kimdir,  
Bormayman, yo'q, yo'q, yo'q.

Yig'im...  
Bo'g'zimni to'ldirar bir og'riq,  
U ham senga yotdir hoynahoy,  
Ko'zyoshimdan erib ketyapti  
Samodagi ko'ngli yarim oy.

Sevgim...  
Sevgi haqqi! Aytmayman!  
Sabot bilan tishlab labimni.  
O'zing sezgin, tinglab tushungin  
Yig'im, qayg'um, kulgularimni...



## ILTIJO

Qanoat ber, bergin bardosh, kuch,  
Yelkalarda sobit bo'lsin burch,  
Uchmoq kerak bo'lsa, intil, uch,  
Osmon qadar yurak ber, Rabbim!

Afsonami o'sha Oynako'l?  
Xayolotga cho'kkanmidi dil?  
Meni kutib charchadimi yo'l?  
Yaxshilikdan darak ber, Rabbim!

Ishq bilan baxt birligi - visol,  
Ko'zim - daryo, ketmagay uvol,  
Orzum oppoq kabutar misol,  
Tiriklikdan tilak ber, Rabbim!

Yo'lovchiman - tunganmas yo'li,  
Ohudirman - xatarli cho'li.  
Oqqush bo'ldim, ajdarli ko'li,  
Menga o'zing ko'mak ber, Rabbim!

**MUHAMMAD YUSUF**

Bisotini kapalakka almashtirgan,  
Hayot bilan kamalakni adashtirgan.  
Sodda so'zi ko'zimizni qamashtirgan,  
El baxtiga shunday shoir etdi nasib,  
Muhammad Yusuf.

Tanti og'am, kengfe'lshoir va mardona,  
She'rlaringiz buncha toza va xalqona.  
Yurtni kezib, yurtni suyib oshiqona,  
El baxtiga shunday shoir etdi nasib,  
Muhammad Yusuf.

Yurtning borin, elning orin baland tutib,  
Mag'rur turib, ginalarni jim unutib.  
Bor umrini She'r poyiga gulday tutib  
El baxtiga shunday shoir etdi nasib,  
Muhammad Yusuf.

Ko'klam kelsa adirlarda, bir qizaloq –  
Kulib turgan yonoqlari ho'l qizg'aldoq,  
Sog'inadi bir shoirni eslab shundoq:  
El baxtiga shunday shoir etdi nasib,  
Muhammad Yusuf.

## DO'RMON

Men eshitdim gulg'unchalarga  
Shabbodaning shivirlashini.  
Butog'idan uzilib uchgan  
Yaproqlarning shitirlashini.

Saharlarda erkalar yellar,  
Yuragimdek bezovta bir qush.  
Xotiramni bezab boradi,  
Do'rmon, senda kechayotgan tush.

Do'rmon, qanday tonglaring bordir,  
Oqshomlaring bordir jim, sokin.  
Yuragimning chiltorin chertgan  
So'z sehrida uyg'ondim bu kun.

Do'rmon, tonglaringda bir tutam,  
Oq orzuni tutib oldim men.  
Navoiydek yuksaldi quyosh  
Shu bobomni kutib oldim men.

Botiningga singib boradi  
So'zning sirli qadam otishi.  
Hislarimga hayrat o'radi  
Kapalakning gulni totishi.

Sehrgar so'z, so'zga maftunlar,  
Gul, gul uzra loldir kapalak.  
Go'zallikni yozib bo'lmaydi,  
Yo'q, chizib ham bo'lmasa kerak.

\* \* \*

Ko'nglim – ko'kda kabutar,  
Kengliklardan emar nur!  
Xayolning qanotida  
Suzib boradi masrur.

Qanotim shamoliga  
Ergashadi qo'shiqlar.  
Suluvlar kulgusidan  
Esdan og'ar oshiqlar.

Tuting mening qo'limdan,  
Menga hamroh do'st kerak.  
Yurakka qaytmoq uchun  
Olov kabi so'z kerak!



## MUHABBAT

Qayga ketding bag'rim kuydirgan,  
Nedan ranjib ketding, muhabbat?  
Ehtiroslar topdimi yakun,  
Nahot, oxir bo'ldimi suhbat?

Qolgani shu tilsiz xazonlar  
Izimizda, izlarimizda.  
Kuzgi osmon uzra adashgan  
Turna - ko'zyosh ko'zlarimizda.

Hijron, buncha achchiq azobsan,  
Nahot, yo'qmi o'tmishimga yo'l?  
Yulduzlarga sir aytay desam,  
Ularning ham kipriklari ho'l.

Qayga ketding, aziz iztirob...



## QOYALARGA

Ulug' tog'ning bag'irlarida  
Yayov kezdim – ruhim yayratdim.  
Sokinlikning nolasin tinglab,  
Dil – bulbulim tinmay sayradi.

Tik qoyaga termulgan chog'lar  
Yuragimda uyg'onar vulqon.  
Yer sharining ildizi – tog'lar,  
Hayratini yashirmas osmon.

Huv, haybatli qoya labida  
Mag'rur bir qush uchar muttasil.  
Shu tog'larni akamday ko'rdim,  
Bo'lgim keldi ularga singil.

## BAHORGA AYLANDIM

Ona! Bahorlarga aylandim, rosti,  
Yog'dularga ko'mdi oyning nigohi.  
Bugun yuragimning tagida turib,  
Ko'ksimga tepadi farzandim gohi.

Ona! Bahorlarga aylandim, rosti,  
Nigohimdan o'chdi kuzning dog'lari.  
Yugurib o'tyapman, ortimdan boqar  
Gullab borayotgan Toshkent bog'lari.

## QIZIMGA

“Olti yoshdan yig’sang ortadi,  
Yetti yoshdan yig’sang yetarkan”.  
Ko’zim yumib ochgunimcha to,  
Qizim o’n sakkizga yetarkan.

Gohi topdim, goh bo’ldim judo,  
Har fursatim, har onim taqdir.  
Shunday ulug’ ne’matni Xudo  
Menga nasib etganing baxtdir.

Yetti yoshni to’ldirar qizim,  
Yuzlarida balqib turar oy.  
Yaxshi niyat bilan sep yig’moq  
Hayotimga qo’shmoqda chiroy.

Ulg’ay menga bo’ydosh bo’lib sen,  
Yuzlaringga hayot berar zeb.  
O’n sakkizga yetguningcha to,  
Ezgulikdan yig’ay senga sep!

**TUN**

Sukunat choyshabi jiqqa ho'l bo'lmish,  
Soyni shaloplatib cho'miladi oy.  
Kechaning ko'kdagi marvaridlari  
Ushbu nafosatga qo'shadi chiroy.

Shu munir oqshomda seni esladim,  
Yuragimni tildi achchiq iztirob.  
Ko'zimdan yulduzdek tomdi hislarim,  
Qaydasan, azizim? Javob ber, javob...

Zulmatni poralab borar to'lin oy,  
Poralanib borar oshiq yuragim.  
Olamda borligim bilmadingmi sen,  
Yetib bormadimi, asov tilagim!

Balki, unutgansan o'tli hislarim,  
Asli begonadir senga bu alam!  
Aytgin, ko'ryapsanmi huv yulduzlarni,  
Tuyyapsanmi tunning ovozin sen ham?

Bildingmi, nedan ho'l sukut choyshabi?  
Bilmaysan, bilganlar Xudoga yaqin.  
Mening hayotimning kechalarini  
Shul sabab yoritar ishq degan chaqin.



## AYOL

Bahor seni ko'rgani keldi,  
Kulguchingda tunar emish oy.  
Ko'ksingdagi mehr-muhabbat  
Dunyolarga bermishdir chiroy.

Ayol, sening izingdan boqib,  
Mastona kuz elaydi barglar.  
Sen vafo-la yurib o'tganda  
Sog'ayadi qish degan dardlar.

Ayol, mehring yozga bir tuhfa,  
Isinadi sovqotgan olam.  
Ayol, sening to'rt tomoningda  
Charx uradi muborak kalom.

Qadim turmush tegirmoni ham  
Yuragingga tegib aylanar.  
Kimki seni ardoqlay bilsa,  
Keyin odamlikka saylanar.

## TAASSUROT

*Kasalxonada bir ayolni ko'rgan edim...*

Ko'zlaringda kechani ko'rdim,  
 O', zim-ziyo g'amga to'lgandi.  
 Jonim yalab o'tti bir hasrat,  
 Ko'zlarimda ko'zyosh aylandi,  
 Ko'zlaringda kechani ko'rdim.

Titramagin, ozorlanmagin,  
 Boqqin bolang munchoq ko'ziga.  
 Shunda orom qaytadi tag'in,  
 Halovati qaytar o'ziga,  
 Ko'zlaringda ko'rdim dunyoni.

Xo'rsinmoq ham kerakdir ba'zan,  
 Goho shartdir yig'lash, tozarish.  
 Shunda rangin ko'rasan uni...  
 Sen o'zgacha ko'ra boshlaysan  
 Sirga to'lgan bedil dunyoni.

## BAHOR

Olis o'lkalarda shivirlagan tush,  
Pichirlagan kurtak, oq ko'ylak bodom.  
Qanday eriganin sezmay qoldi qish,  
Bir tunda o'zini yo'qotar olam.

Tiniq samovatda yayraydi qushlar,  
Toshqin anhorlarda oqadi shodlik.  
Sening quchog'ingda o'tgan kunlarim  
Qanchalar shirindir, qanchalar totlik.

Bahor – ko'zlarimda gullagan ilinj,  
Bahor – kipriklarda qiqirlagan yosh.  
Umid-la ko'klarga bo'y cho'zar sevinch,  
Olamga sezdirmay singadi quyosh.

Endi yuragimda ungay boychechak,  
Muz ketgan yerlarning yuzini silab.  
Endi bahor bilan uyg'onish kerak,  
Mehribon zaminning baxtini tilab.  
Samo ham turadi quvonchdan yig'lab...

**O'TINCH**

Ko'zlaringga termulmagin jim,  
Sherik bilmam tuyg'ularimga.  
O'ylarimda aylanma endi,  
Yupanch bo'lma qayg'ularimga.

Xalal berma derazalardan  
Boqsam olis dovonlarimga.  
Chiqaverma noxos yo'limdan,  
Tikon bo'lib tovonlarimga.

Ket, qalbimdan, ket hayotimdan,  
Xotiramdan tush kabi o'tgin.  
Ko'tarilgin butkul yodimdan,  
Unutay men, sen ham unutgin.



## IQROR

O'z-o'zimcha umr yo'lin tanladim-u,  
So'ng alamdanda yuragimni tilib oldim.  
Izhorlarin yolg'onligin angladim-u,  
Ich-ichimdan sevishimni bilib qoldim.

Sevgi degan saroblardan bezgan edim,  
Endi umrim ro'yoblarga ko'chib borar.  
Yuragim-la suhbat qilib oldim bugun,  
Nimalardir xotiramdan o'chib borar.

O'chib borar, ko'chib borar yuragimdan,  
Tanish-u yot tuyg'ularning ovozasini.  
Mard bo'l, yurak, endi ortda yo'l yo'q senga,  
Ochilmaydi o'tmishingning darvozasi.

Men hayotda o'z yo'limni tanladim-u,  
So'ng alamdanda yuragimni tilib oldim.  
Izhorlaring yolg'onligin anglaganda  
Ich-ichimdan sevishimni bilib qoldim.

## SEVGIM BORDIR

Tuyg'ulardan boshqa tanish-bilishim yo'q,  
Muhabbatdan boshqa mening yumushim yo'q.  
Olmosim yo'q, oltinim yo'q, kumushim yo'q,  
Faqatgina sevgim bordir yuragimda.

Sizga umid bermoq uchun umidim yo'q,  
Dildan boshqa bir qadam ham, bir odim yo'q,  
Yo'q narsani bor qilguvchi omadim yo'q,  
Faqatgina sevgim bordir yuragimda.

Hayot goho mensimaydi tuyg'ularni,  
Tan olmaydi nola birla oh-vohlarni,  
Men o'zimga yo'ldosh qilay ohularni,  
Faqatgina sevgim bordir yuragimda.

Armonlarga aylanmagan bayotlarga,  
O'zim fido aylay adabiyotlarga,  
Men borimni tuhfa qildim hayotlarga,  
Qizg'onish yo'q, havas bordir yuragimda.

Faqatgina sevgim bordir yuragimda...

**HIJRON KO'PRIGI**

Zuvillab yonimdan o'tayotgan vaqt,  
Mohir chevar kabi yamar o'tmishni.  
Meni uzoq kutdi dovonda bir baxt,  
Men esa bilmadim unga yetishni.

Kipriklarim go'yo uzun bir ko'prik,  
Undan o'tmoq uchun topa qol bardosh.  
Bu uzun ko'prikdan o'tmading hech sen,  
Undan o'taverdi achchiq-achchiq yosh.



## TASKIN

Yo'llarim bir Yo'lga ketdi tutashib,  
Ko'zlarim ko'zyoshning qo'lidan tutdi.  
Samoda qilichday yaltiradi oy,  
Men kutgan yulduzim olisdan o'tdi.

Goh o'ksib, goh kulib boqdim yo'liga,  
Layliday sarg'aydi ko'nglim chechagi.  
Qanday ovutolsin siyoh ko'ngilni  
Uzoqlashib ketgan ishqning ertagi.

Yo'q, o'ksinmoq bekor! Garchi hijron bor,  
Garchi vujudimda o'chmay qoldi cho'g'.  
Ha, men baxtiyorman. Dil ishqqa to'la,  
Qancha gumroh buni bilgani ham yo'q.





## JIMLIK

Jimlik – shovqinlarning ko'ryotgan tushi,  
Nozik barmoqlarni o'par harorat.  
Ruhimga qo'nyapti halovat qushi,  
Samoda suzadi hassos tilovat.

Ufqlar rangiga bo'yalgan huzur,  
Sahrolar bag'rida changigan xayol.  
Bir zum dimog'imda muzlagan g'urur,  
Menga qardosh bo'lgan pokiza ayol.

Jimlik – sog'inchlarning alamli tushi,  
Tog'larning poyida ulg'ayar viqor.  
Orzular, niyatlar, sertashvish turmush,  
Meni rom aylaydi bir jo'mard iqror.



## YURAK BILAN SUHBAT

### I

Bugun ko'nglim to'ldi sendan, yuragim,  
Sevgi janggohidan qaytolding omon.  
G'amg'usor ohingni tinglash - tilagim,  
Bu tun diydoringni sog'indim yomon.

### II

Odam o'zini ham sog'inar gohi,  
Ko'rgisi keladi borin boricha.  
Mana, oshiq edi mening yuragim,  
Dardini tinglayman... tonggacha.

Yomg'ir ham boshladi, qanday soz,  
Zulfimni o'ynadi bir sabo.  
Dil menga, men unga aytdik roz,  
Boringga ming shukr, yo, Oллоh!  
Yuragim sog' ekan, yo, Oллоh!



**MAKTUB**

Ona, qizing ulg'aydi bugun,  
Bir lahzada buni ilg'adim.  
Paxsa devor ortida qolmish  
Bolalikni eslab yig'ladim.

Ona, esgan erka shamolda  
Arg'imchog'im silkinib turdi.  
U bo'sh emas ekan, qarasam  
Bolaligim uchyapti – ko'rdim.

Bugun kelin bo'ldi arazchi,  
Ham erkatoy qizingiz, ona.  
Hayot qo'li qattiq muallim,  
Ro'paramda shunday darsxona.

Baxtim shulki, baxtim tanidim,  
Etagidan mahkam tutdim men.  
Ona, senga erkatoy edim  
Endi baxtli ayol bo'lay men.

## ERKA HIS

Erka xayollarning bandargohida  
Erka hislar bilan suzib yuraman.  
Orzular ufq sari yetgan chog'ida  
Baxtni marjon kabi tizib turaman.

Erka tuyg'ularga boylanib bu dam,  
Ozod hayrat bilan erkni quchaman.  
Maysa qulog'ini cho'zgan yomg'irman,  
Atirgul bandiga ko'chaman.

Erka yaproqlarning kaftiga tushib,  
Erka shabnam bo'lib porlab turaman.  
Orzularning issiq taftida pishib,  
Quyoshning yoniga chopib boraman.



## ORZULAR

Asli, orzulardan yuksaldi osmon,  
Orzu bulog'idan tuyganman men ham.  
Qo'llaringa orzu niholin tutgan,  
Biri otam bo'lsa, birisi onam.

Orzuni qanotga o'xshatgan ilk bor  
Kim bo'lsa, shubhasiz, vallomat shoir.  
Mening orzularim tuproqdan o'sgan  
Orzuimga quyosh aytib o'tar sir.

Otam matonatning jonli surati,  
Mehnatda suyagi qotgan aziz zot.  
Butun irodamga chizib jur'atin  
Parvoz etar bo'lsam, baxsh etgan qanot.

Onamning duosi qo'rg'on, shubhasiz,  
Ko'ksimda elimning shoni-shuhrati,  
Ona vatan deyman, ota yurt deyman,  
Ota-onam hamda Vatan hurmati.

## MUNDARIJA

<b>Shodmonqul Salom. Tuyg'ular alangasi.....</b>	<b>3</b>
She'riyat.....	5
Onamga.....	6
Vatan.....	7
Yillar, yo'llar.....	8
Masofa.....	9
"Bolalikni terakzorlarda...".....	10
Kitoblar bahsi.....	10
Baxt isi.....	11
Bolaligim.....	12
Marg'ilonim.....	13
"Qo'shtegirmon erur...".....	14
Manzara.....	14
Begim.....	15
"Bir og'iz so'z...".....	16
"Yuzlarimni silaydi bir his...".....	17
Tong qo'shig'i.....	18
Buloq.....	19
Xotira.....	20
"Senga to'qnash keldim tasodif...".....	21
"Kulgum...".....	22
Iltijo.....	23
Muhammad Yusuf.....	24
Do'rmon.....	25
"Ko'nglim - ko'kda kabutar...".....	26
Muhabbat.....	27
Qoyalarga.....	28
Bahorga aylandim.....	28

Qizimga.....	29
Tun.....	30
Ayol.....	31
Taassurot.....	32
Bahor.....	33
O'tinch.....	34
Iqror.....	35
Sevgim bordir.....	36
Oy qiz.....	37
Hijron ko'prigi.....	38
Taskin.....	39
Jimlik.....	40
Yurak bilan suhbat.....	41
Maktub.....	42
Erka his.....	43
Orzular.....	44
"Dilda ne bor, tushundim...".....	45

UO'K: 978-9943-6472-7-5

KBK: 83.3(50'zb)

Φ 14

Φ 14 **Umurzoqova, MahliyoXon.**

Kaftdagi yo'l [matn]: *she'rlar*/ M.Umurzoqova.  
– Toshkent: "Adabiyot" nashriyoti, 2020. – 48 b.

*Adabiy-badiiy nashr*

MahliyoXon UMURZOQOVA

# TUYG'ULAR ALANGASI

*She'rlar*

Muharrir: *D. Mingboyeva*

Badiiy muharrir: *F. Ermatov*

Sahifalovchi: *N. Soatov*

Musahhih: *Sh. Hakimova*

O'zbekiston Yozuvchilar uyushmasi  
"ADABIYOT NASHRIYOTI" MCHJ

Nashriyot litsenziyasi: AI № AA 0043. 27.01.2020.

100129, Toshkent shahri, Markaz-15. 1/90.

☎ (98) 128-30-04. e-mail: mashkhur-press@mail.ru

Bosishga 20.11.2020-yilda ruxsat etildi:

Ofset qog'oz. Qog'oz bichimi: 70x90 <sup>1</sup>/<sub>32</sub>.

Ofset bosma. Hisob-nashriyot t. 1,5.

Adadi: 10000 nusxa. Buyurtma №340.

"AZMIR NASHR PRINT" MCHJ bosmaxonasida chop etildi.  
100200, Toshkent shahri, Adham Rahmat ko'chasi, 10-uy.







MAHLIYO UMURZOQOVA

TUYG'ULAR ALANGASI

Mahliyo Umurzoqova 1990-yil Farg'ona viloyati Marg'ilon shahrida tug'ilgan. Toshkent Hidrometeorologiya kasb-hunar kollejini tamomlagan. Hozirda Kamoliddin Behzod nomidagi Milliy rassomlik va dizayn instituti "San'atshunoslik" fakulteti 2-bosqich talabasi. 2018-yilda o'tkazilgan Respublika yosh ijodkorlarining Zomin seminari ishtirokchisi.

**"ADABIYOT"**  
NASHRIYOTI

ISBN 978-9943-6472-7-5



9 789943 647275

